

Leta I Wa Wenjiya
Hibru
Jisas Gha Ghambu
Utuniye
Utu iviva

Letake iyake Jiu, iya thavala kaero thi lonweghathigha Jisas, lenji leta. Jiu ghaliñanji vana Hibru, iya kaiwae valikaiwae tembe ranava thiye Hibru gharighariniye. Iyemaenge ma ra ghareghare thela va i roriya letake iyake na i variye wenji, na tembe ngoreiyeva ma ra ghareghare wagi yawe ralonwelonweghathiko thiyako va inanji e the valivanja. Ghayamoyamo ngoreiya rarorori letake iyake va i rori theghathegha 60 na 70 A.D. e ghanjilughawoghawo, amba muyai Rom thi tagarakaraka Ngolo Boboma Jerusalem e tine. Mbanako iyako Rom i mbaronja yambaneko wolaghiye.

Thiye Jiu ralonwelonweghathi thi vaidiya viri lenji lonweghathiko kaiwae na vavana mbalama thi rakanjogha Jiu e lenji kururu na lenji vowo e Ngolo Boboma. Iya kaiwae rarorori i vagharenji Jisas iye i laghiye kivwalanjiya nyao thovuthovuye na amalaghiniye Loi Nariye (Vangothiye 1), ko iyemaenge amalaghiniye i tabo na lolo ghinda kaiwanda (Vangothiye 2). Na tembe ngoreiyeva, i laghiye kivwalanjiya Mosese na Josuwa (3:1-4:13). I utuna na inja Jisas iye ravowovowo ngoreiya Melkisedek na le kaiwoko i thovuye kivwalanjiya ravowovowo

me vivako lenji kaiwo. Jisas iye va i vamidiya dagerawe togha. Dagerawe teuye ma valikaiwae i vanamwenjiya gharighari na thi rumwaru Loi e marae, ko iyemaenge Jisas mbe ghambergha vara e madibae i vanamweinda (4:14-5:10 na 7:1-10:18). Iya kaiwae renuwanake thiyake kaiwanji i vavurighheghengi na thava thi njogha e ghereinji, ko iyemaenge mbema thi ghatanaghathi enge weinji lenji ghare matuwo thi roroghagha iya thovuyeko Loi va i dageraweko kaiwanji (6:11-12 na 10:35-36, 39). I dage wenji na valikaiwae ra vikikighathi na valikaiwae ra varemija Loi (10:23), na e marandake mbe ra vonjimbughathi vara Jisas na ra ruku wagiya (12:1-3).

Jisas, Loi Nariye, i Laghiye kivwalangiya Nyao Thovuthovuye

¹ Mevivako me mbanja tomethi na e kamwathi tomethi tinenji, orumburumbunda thi lonweya Loi le utu wenjiya ghalinae gharautu,

² ko iyemaenge e mbanake iyake, iye mbanja momouniye, ra lonweya Loi le utu weya Nariye. Weya amalaghiniye Loi va i vakathangiya yambaneke na buruburu, na iye Loi kaerova i tuthi na bigibigike wolaghiye inawe ne i mbaroja.

³ Iye Loi le vwenyevwenye manjamanjalawae na iye ngoreiye moliya Loi. Iye le utuutuko ele vurigheghe na i vakatha bigibigike wolaghiye mbe inanjiwe vara. Amalaghiniye i mare na i thavwiya gharighari lenji thari ko mbanja i

vakathavao iyako, i voro e buruburu na i yaku
Loi Vurivurighhegheniye Moli valivanga e uneko.

⁴ Loi va i vakatha Nariye na i laghiye
kivwalangiya nyao thovuthovuye, ngoreiya
idako iya Loi va i unogiyakowe i laghiye kivwala
nyao thovuthovuye idanji.

⁵ Ngoreiyako kaiwae Loi mava mbaņa regha i
dage weya le nyaoko thovuthovuye regha na iņa,
“Ghen Narungwa ghen; na noroke ya tabona
Ramanina ghino.”

Na amalaghiniye utuniye Loi tembe iņava:
“Ghino ne ya tabo Ramae na amalaghiniye
Narungu.”

⁶ Tembe ngoreiyeva mbaņa Loi i variya Nariye
ghagamau e yambaneke, amba iņa, “Lo nyaoko
thovuthovuye wolaghiye ne thi kururuwe.”

⁷ Le nyao thovuthovuye kaiwanji Loi iņa:
“Ya vakathangiya lo nyao thovuthovuye
rakakaiwo ngoranjiya ndewendewe na
ndighe mamiye.”

⁸ Ko iyemaenge Nariye utuniye iņa:
“Mbema Loiya ghen, len ghamba mbarona i
meghabana ma ele ghambako;
wein ghanithanavu rumwaru u mbaronangi na
thovuye len gharighari.

⁹ U warariņa thanavu i rumwaru na u botewoy-
athu thanavu raithari,
iya kaiwae wein len warari laghiye, ghino
len Loi ya lingiya bunama e umbalina
na ya vanjurawenge u mbaronangiya
ghanunena.”

1:5 Sam 2:7; 2Samu 7:14

1:6 Mba 32:43

1:7 Sam 104:4

1:9 Sam 45:6,7

- 10 Loi tembe i dageweva Nariye ija:
 “Giya, va i rikowe ghen u vakatha yambaneke,
 na buruburuko ghen niman muiye.
- 11 Yambaneke na buruburu ne thiko, ko iye-
 maenenge ghen u meghabana.
 Thiye ne thi thari ngoreiya kwama
 ghambighambi i ghambi na i vwatha.
- 12 Tene u vaghilenzi ngoreiya thi senisiya ghan-
 jikwama.
 Ko ghen ma u totomethi, na yawalina ma ele
 ghambako.”
- 13 Loi ma mbanja regha i dage weya le nyao
 thovuthovuye regha na ija:
 “U yaku gheke, valivanga e unenguke ghaghada
 ne ya biginjonangiya ghanithighiya e
 gheghenina raberabe.”
- 14 Ko nyao thovuthovuye thavalangi? Thiye
 nyaonzi thi kaiwo weya Loi na i varivariye
 wenziya gharighari kaero thi vaidiya vamoru na
 thi thalavunzi.

2

Wo hu goruwe Loi ghalinae

¹ Kaiwae Jisas i laghiye kivwalanziya nyao
 thovuthovuye, wo ra vikikighathigha iya emu-
 njoruko kaerova ra lonweko, mbala ma ra
 ghagha itete na ra bwagabwaga moliwe.

² Ra ghareghare mevivako nyao thovuthovuye
 methi utugiya Loi ghalinae weya Mosese. Utu-
 utuko iyako emunzoru na the gharighari thi

valananiya na ma thi ghambu ne thi vaidiya ghalithi i mboromboro weye lenji vakathako.

³ Ne ngoronnga rana na ra voiteta lithiko iyako thonjo ma ra goru weya vamoruko utuniye? Giya mbe ghamberegha vara i govambwara weinda, thavala va thi lonje weya amalaghiniye, thi utuja ghaemunjoru weinda.

⁴ Na Loi mbowo i vaemunjorunava totoke iyake weinda ele vakatha e vakatha ghamba rotaele tomethi tinenji na i giya Nyao Boboma ghabebe wenjiya gharighari ngoreiya le renuwana.

Jisas iye lolo, kin mara mbouye na ravowovowo laghiye

⁵ Loi mava i tuthinjiya nyao thovuthovuye na mbala thi mbaronja yambane togha, iya ambane i vakathako na kaiwae wo rorori e ghemi.

⁶ Iyemaenge Buk Boboma e tine Sam ghararorori i woranjiya lolo utuninda i dage weya Loi inja:

“Lolo iye thela na Loi i rerenuwana kaiwae? Ngoronnga enge na i thathalavu wenjiya gharighari?”

⁷ Kaero u worawe na seiwo i yaku nyao thovuthovuye e raberabenji, kaero u vavwenyevwenye na u wovorena idae,

⁸ na kaero u worawe ne i mbaronjiya bigibigike wolaghiye.”

Bukuke iyake inja Loi kaerova i bigirawenjiya gharighari na thi mbaronjiya bigibigike wolaghiye, na gharumwaru ngoreiya ma tembe

bigi reghava inawe na mane gharighari thi mbaronja. E mbanjake iyake ma ra thuwe gharighari thi mbaronja bigibigike wolaghiye.

⁹ Ko iyemaenge Jisas, iye va i tabo na lolo na seiwo i yaku nyao thovuthovuye e raberabenji, ra thuwe i mbaronjanjiya bigibigike wolaghiye. I tabo na lolo amba Loi le mwaewo bwagabwaga e tine iye i mare gharigharike wolaghiye kaiwanji. Va i ghatana viri na i mare amba Loi i vavwenyevwenye na i wovorenja idae.

¹⁰ Loi va i vakatha bigibigike wolaghiye na bigibigike wolaghiye amalaghiniye kaiwae. Amalaghiniye nuwaiya i vangunjiya le nganga lemoyo na i vavwenyevwenyengi, iyava i vakatha Jisas i tabona lolo na i vaidiya viri na e tine valikaiwae i tabo lenji vamoruko righe na i ndeviva wenjiya gharighari thi vaidiya vamoru. Valikaiwae moli Loi va i vakatha ngoreiyako.

¹¹ Kaiwae iye Ravaboboma na weijanjiya thavala i vabobomanji Ramanji regha. Iya kaiwae ma i monjinanja ne inja oghaghaengi,

¹² na ne i dage weya Loi na inja:

“Ne ya utuja ghanithanavuna wenjiya oghaghanju, na ya tarawenge e lenji mevathavatha tine.”

¹³ Na tembe inja: “Ghino ya vareminja Loi,” na mbowo inja, “Ghinoke iya weinguyanjiya Loi le ngamanjama iyava i giyake e ghino.”

¹⁴ Loi le ngamanjamako thiye mbunima na madibe, na amalaghiniye tembe ngoreiyeva i tabo mbunima na madibe ngoreiya thiye. Va

i vakatha ngoreiyako mbala le mareko e tine i mukuwo Seitan, kaiwae Seitan iye i mbaro mare ele valivanga.

¹⁵ Na e kamwathike iyake Jisas i rakayathunjiya thavala mbanja molao e yawalinjiko mare mararuniye i mbaronangi.

¹⁶ Emunjoru Jisas iye ma nyao thovuthovuye ghanjirathalavu ngoreiye, ko iyemaenge amalaghiniye Eibraham orumburumbuye ghanjirathalavu.

¹⁷ Iya kaiwae e bigibigike wolaghiye iye ngoreiya oghaghaengi na valikaiwae ngoreiya ravowovowo laghiye. Iye i tabo ravowovowo laghiye e ghavareminje na ghare wenjiya gharighariko na i vakatha na i vamboromboro Loi le kaiwo, na iye i rakayathu gharighari lenji thari.

¹⁸ Kaiwae amalaghiniye va i vaidiya tanathetha na i ghatana viri, valikaiwae i thalavunjiya gharighari thi vavaidiya tanathetha.

3

Jisas i laghiye kivwala Mosese

¹ Iya kaiwae, lo bodaboda, ghemi Loi le gharighari na weinguyangiya ghemi Loi i kula weinda ra rakawe, wo hu renuwana Jisas kaiwae. Amalaghiniye Loi ghalinae gharaghambi na ravowovowo laghiye iya ranama na ra lonweghathi.

² Amalaghiniye va i vakatha na i vamboromboro Loi le kaiwo ngoreiya Mosese va i vamboromboro Loi le renuwaᅇa na i kaiwo Loi ele ngolo, iya Loi le gharighari.

³ Ra ghareghare loloko iya i vatada ngoloko iye e ghatarawa na ngoloko ma e ghatarawa. Tembe ngoreiyeva iyake, valikaiwae moli ra tarawe Jisas na raᅇa iye idae i laghiye kivwala Mosese idae.

⁴ Ngolo regha na regha mbe gharavakatha, na Loi iye bigibigike wolaghiye ghanjiravakatha.

⁵ Mosese iye Loi le rakakaiwo, va i emunjoru ele kaiwoko tine, i vamboromboro Loi le renuwaᅇa na i kaiwo le gharighari kaiwanji. Ghakaiwo i utuᅇa bigibigi tene thi yomara e manjamanjala utuninji.

⁶ Ko iyemaenᅇe Krai iye Loi Nariye, kaero i vamboromboro Loi le renuwaᅇa na iye Loi le ngolo gharighariniye umbalinji. Ghinda Loi le ngolo gharighariniye, thonᅇo weinda la gharematuwo ra vareminje na weinda la warari ra roroghagha thovuyeko iyava i vivatharaweko kaiwanda.

Ralonᅇelonᅇeghathi ne thi Towo

⁷ Iya kaiwae, hu lonᅇe Nyao Boboma ghalinᅇae ngoreiyake inᅇa:

Noroke, thonᅇo hu lonᅇe Loi ghalinᅇae,

⁸ thava gharemina i vurigheghe ngoreiya orumburumbumi gharenji va i vurigheghe na thi thighiya wanᅇo.

Mbaņa lenji lonjalonga e njamnjambwaga, thi wovanjovanjongo na lo ghatanaghathi kaiwanji thi mando.

⁹ Othembe va thi thuweya lo vakatha theghathegha ghwevari e tine ko iyemaenġe thi wovanjovanjongo na thi mandongo.

¹⁰ Thako iyako lenji vakathako kaiwae ya gaithi wanangi, na ya utuutu kaiwanji yaņa, “Mbanjake wolaghiye thi botewoyathungo, na ma thi ghambugha lo mbaro.”

¹¹ Iya kaiwae weingū lo gharegaithi ya utuņa dagerawe vurivurighegheniye regha kaiwanji yaņa, “Mane thi ru lo towoko e tine.”

¹² Iya kaiwae, lo bodaboda, hu njimbukikinga na thava regha e tinemina renuwaņa raithari ina e ghare na i vakatha ma i lonweghathi, ne iwaenġe i roghereiyewana Loi e yawayawaliye.

¹³ Ko iyemaenġe ghemi thava hu vakatha ngoreiyako, ngoreiya Buku le utuutu iņa: “Mbanjake noroke,” e mbanjake iyake ghamimbanja thovuye. Na mbaņa regha na regha mbala hu veutu vavurigheghe wengā na thava thari thanavuniye i yarogha ghamu regha na ghare i vurigheghe.

¹⁴ Ghinda Krais ghaune valighareghare moli, thongo la lonweghathi i vurigheghe ngoreiya va i viva la lonweghathima na ra vikikighathi ghaghada mare ghambaņa.

¹⁵ Buku le utuutu iņa ngoreiyake:

Thongo hu lonweya ghalinangu noroke thava gharemina i vurigheghe ngoreiya orumburumbumi gharenji va i vurigheghe na thi thighiya wanango.

¹⁶ Thavala va thi lonweya Loi ghalinae ko iye-maenge thi goriwoyathu? Ko ana gharighariko wolaghiye iyava Mosese i vivako wengi na thi rakanjikiko Ijpt e tine?

¹⁷ Thavala Loi va i gaithiwanangi theghatheghe ghwevari e tine? Ko ana gharighariko iyava thi vakatha thariko, na lenji thariko kaiwae thi mare bwagabwaga e njamnjamiko?

¹⁸ Thavala Loi va i vakatha ghanjidagerawe vurivurigheghe niye na inja, "Mane vethi ru elo towoko tine?" Va i ututu thavala mava thi ghambugha ghalinaeko kaiwanji.

¹⁹ Ko ambama ra thuwe ma valikaiwanji thi raka ru ele towoko tine kaiwae mava thi lonweghathi.

4

¹ Loi le dagerawema mbe inawe vara i yakuyaku, iya inama valikaiwae ra ruwe na ra vaidiya towo weya amalaghiniye. Iya kaiwae ra njimbukiki na thava ghemina regha Loi ne i tuthi itete na ma ve ru.

² Ra njimbukikinda kaiwae Toto Thovuye kaerova thi utuja weinda na ra lonwe, ngoreiya thiye va i vivako thi lonweya Loi ghalinae, ko iyemaenge utuutuko iyako mava i thalavungi;

kaiwae vambema thi lonwenge, ko mava thi lonweghathi.

³ Ghinda, thavala kaero ra lonweghathi, ra ru na ra vaidiya towo. Towo utuniye iyava Loi inake:

Weingu lo gaithi ya utunja dagerawe vurivurighegheniye kaiwanji na yanja, “Mane thi raka ru lo towoko e tine.”

Loi va inja ngoreiyako othembe budakaiya le renuwanja va inja ne i vakatha na kaero va i vakathavao mbananiye va i vakatha yambaneke.

⁴ Kaiwae Buk Boboma e tine rorori regha i utuuta mbanja ghepiriniye kaiwae, inja, “Mbanja ghepiriniye e tine Loi i towowe ele vakathako wolaghiye.”

⁵ Na Loi ghalinae mbowo ra lonweva mbanaiwoniye iya inake, “Mane thi ru elo towoko tine.”

⁶ Emunjoru gharighari vavana ne thi raka ru Loi le towo e tine, na emunjoru me vivako me thi lonweya Loi le utu mava thi raka ru, lenji goriwoyathu kaiwae.

⁷ Iyake kaiwae Loi mbowo i woraweve mbanja regha, iya kaiwae inja, “Mbanake noroke.” Theghathegha lemoyo e ghereiye amba Loi tembe i ravairiva utuutuke iyake weya Deivid, ngoreiya mbema ma utunama, inja:

Mbanake noroke, thonjo ghino Loi ghalinangu i rangi wenga, thava gharemina i vurigheghe.

⁸ Thongo Josuwa va i giya towo wenjiya gharighari ngoreiya Loi le dageraweko wenji, mbala ma tembe i utuutuva mbanja regha kaiwae.

⁹ Iya kaiwae ra ghareghare towo mbe inawe vara Loi le gharighari kaiwanji ngoreiya Loi le towo ghambanja, mbanja ghepiriniye.

¹⁰ Kaiwae thongo lolo regha i ru e towoko iya Loi va i dageraweko e tine, iye kaero i towo ele kaiwo tine, ngoreiya va i rikowe Loi va i towo ele kaiwo tine.

¹¹ Iya kaiwae wo ra rovirigheghe laghiye na ra ru varathuwe towoko iyako, na thava ghindake regha i dobu kaiwae ma i ghambugha Loi le utu, ngoreiya thiye mevivako mava thi ghambu.

¹² Loi ghalinae iye e yawayawaliye na ele vurigheghe, i lawe moli, na i lawe kivwala gaiti ghaghalithi marae vanja na vanja. Utuutuko iyako i ru maya moli, na i vothewo gharenda na unenda ngoreiya kaina i lawe moli i vothewo riwandake nginauye na vuvuye. Iye i ghatha gharendake ghaminae na le renuwanja.

¹³ Loi i ghareghareya bigibigiko wolaghiye gharighari wolaghiye kaiwanji na ma bigi regha i rothuwele Loi e marae. Weya amalaghiniye bigibigike wolaghiye i mavu na i manjalawe, na nevole ra ndeghathi e marae na i vanivanjainda la vakatha kaiwae.

Jisas iye la ravowovowo laghiye

¹⁴ Wo ra vikikighathi la lonweghathiko iya ra uturanjiyako kaiwae la ravowovowo laghiye kaero inawe, na iye kaerova ve ru e buruburu, iye Jisas, Loi Nariye.

¹⁵ La ravowovowo laghiye amalaghiniye valikaiwae moli e la njavovoke ne ghare i njaweinda, kaiwae va i vaidivao tanathethako wolaghiye ngoreiya ghinda, ko iyemaenge mava i vakatha thari.

¹⁶ Mbema weindaenge la gharematuwo ra wa weya Loi vurivurighheheniye, iye ragharemwawo. Na thongo e ghandavuyowo, iye ghare ne i njaweinda na weiy le mwaewo bwagabwaga i thalavuinda.

5

¹ Ravowovowo laghilaghiye regha na regha ghatututhi i mena wenjiya le valiravowovowo, na i kaiwo Loi le gharighari kaiwanji. Iye i mbana gharighari lenji mwaewo na i vakatha vowo lenji thari kaiwae.

² Iye valikaiwae gathanavu i udauda wenjiya ranumounouno na thavala ma thi ghareghare iyanganiya thovuye, kaiwae amalaghiniye tembe ele njavovova.

³ Iyake kaiwae mbanja i vowo tembe i vowova amalaghiniye na gharighari lenji thari kaiwae.

⁴ Bigi reghava, ma valikaiwae lolo regha tembe ghamberegha i wovorena na i tabo ravowovowo laghiye. Loi ghamberegha i kula weya loloko iyako na i tabo ravowovowo laghiye, ngoreiya va i kula weya Eron.*

⁵ Tembe ngoreiyeva Krai. Mava i wovorena ghamberegha na mbala i tabo na ravowovowo laghiye. Ko iyemaenge Loi va i wovorena e

* 5:4 Eron iye iviva moli i tabo na ravowovowo laghiye.

ghamba yakuko iyako. Loi kaerova i dagevaowe ija:

“Ghen narungwa ghen, noroke ya tabo na Ramanina ghino.”

⁶ Na tembe inava e Buk Boboma regha tine i dagewe ija: “Ghen mbanjake wolaghiye ma ele ghambako ne u tabo ravowovowo ngoreiya Melkisedek iye va ravowovowo.”

⁷ Mbanja Jisas vamba ina e yambaneke le nango e tine e ghareko laghiye i kula voro weya Loi weiye le randa na valikaiwae i vamoru e mare. Loi va i lonweya le nangoko, kaiwae i gharenja na i varenja Loi.

⁸ Ko iyemaenge othembe va i nango na ngoreiyako na othembe iye Loi Nariye, va i ghatana viri na i mare, na e tine valikaiwae i ghareghareya Loi ghalinae ghaghambu.

⁹ Kaiwae i vakatha ngoreiyako, i vaemunjoruna moli iye valikaiwae moli i giya vamoru memeghabananiye wengiye gharigharike wolaghiye iya thavala thi ghambu ghalinae.

¹⁰ Na iyako e vwatae, Loi kaerova i vaemunjoruna na i tabo ravowovowo laghiye ngoreiya Melkisedek iye va ravowovowo laghiye.

Lemi lonweghathi weya Krais ne hu ndeviyathu

¹¹ Bigibigi lemoyo mbe inanjiwe nuwameiya wo utuna Krais kaiwae, iye ravowovowo laghiye ngoreiya Melkisedek, ko iyemaenge i vuyowo ne wo vamanjamanjala wenga kaiwae lemi gharegharena i vuyowo.

¹² Vambe teuye valikaiwami hu tabo ravavaghare na hu vavaghare wenjiya ghamune, iyemaenge lemi ghareghare amba ma i laghiye, na renuwana iviva moli Loi le ututu kaiwae lolo regha wo i vagharenga. Ghemi ngoramiya ngama gunagunagha, amba thu vara i ndewonga, na amba ma valikaiwami hu ghana ghaninga vurigheghe.

¹³ Thavala amba thi thuthu, thiye gamagai gunagunagha na amba ma e lenji ghareghare iyanganiya i rumwaru na iyanganiya i thari.

¹⁴ Ko iyemaenge ghaninga vurigheghe gharighari matuwo kaiwanji, na thiye kaiwae tembe ghanjimberegha kaero thi vagharengi valikaiwanji thi tuthiya thovuye na thari.

6

¹ Iya kaiwae wo ra ghao enge e ghamwandako na ra wo vavaghareko iya valikaiwae i vaghare matuwonaindako na wo ra viyathu budakaiya vama thi vaghareinda Kraisi kaiwae. Thava tembe ra vairiva utuutuko iya ra ndeghereiye-wana vakathako i womena mareko na mbema ra lonweghathi enge Loi.

² Kaero va thi vaghareinda bapitaiso kaiwae na ekelesiya gharandeviva thi bigiraweya nimanji e umbalinda. Kaero ra ghareghareya ramaremare tembene thi thuweiruva mare e tine na ghatha ghambana e mbanja momouniye. Bigibigike thiyake ma valikaiwae ra vairiva.

³ Mbema ra ghawoenge e ghamwandako thonjo Loi le renuwana ngoreiye.

4 Thongo gharighari kaerova Loi manjamanjalawae i woya wenji, na kaerova thi ghaminogha Loi le mwaewo ghaminae na weinjiyangiya ralonwelonweghathike wolaghiye kaero thi wo Nyao Boboma,

5 na Loi le utuutu wenji kaerova thi ghaminogha ghaminae, na kaerova thi ghamino ghavurighegheko iya Loi ne i vakaiwonako mbanja muaiko,

6 na thongo kaero thi roiteta lenji lonweghathi weya Kraisa na thi botewoyathu, kaero ma valikaiwae tembe ra vanjunjoghanga na thi ndeghereiyewana lenji thariko, iyako ngoreiya tembe thi rokrosiva Loi Nariye na thi vamonjina gharighari e maranji.

7 Nuwanjuiya hu thuwe ralonwelonweghathi ngoreiya uma. Thongo uye i nja valana ele thelauko na une i thovuye, Loi ne i mwaewowe.

8 Ko iyemaenge thongo kavwala na nana raraithari thi mbuthuwe ma e ghathovuye na kaero Loi i gura na le ghambako venda e ndighe une.

9 Ko iyemaenge, ghamaune valighareghareme, othembe thongo wo utunangiya utuutu e ghaminanji e ghemi, ghareme mbe i matuwo enge e ghemi. Wo ghareghare wagiya kaero hu vurimban e kamwathiko iya valikaiwae thavala Loi kaero i vamor.

10 Loi iye i rumwaru, na mane i renuwana vaghalawa iya kaiwona hu vakathana o iya lemi gharethovu amalaghiniye kaiwaena ve rangi e lemi thalavuna na mbe hu thalathalavuna wenjiya lemi valiralonwelonweghathi.

¹¹ Nuwameiya moli ghemi regha na regha mbe hu vikikighathi vara iya vakathako iyako ghaghad yawalimi ele ghambako, mbala lemi gharematuwona i vurigheghe na hu roroghagha thovuyeko iya Loi va i dageraweko kaiwanda.

¹² Ma nuwameiya hu njavovo, ko iyemaenge ghamithanavuna ngoreiya thavala thi lonweghathi na thi ghatanaghathi kaiwae lenji vakathako une thi wo budakaiya Loi va i dagerawe kaiwanji.

Loi le dagerawe ne i emunjoru

¹³ Ghamba thuwathuwa regha iyake: Mbanja Loi i utunja le dagerawe weya Eibraham, mava tembe lolo reghava iye idae i laghiye kivwala amalaghiniye na valikaiwae i tholo e idae, vambema i wo amalaghiniyeko idae na i tholowe.

¹⁴ Inja, “Ya dagerawe emunjoru ne ya mwaewo e ghen na orumburumbu nevole lemoyo.”

¹⁵ Eibraham vambe i ghatanaghathi vara na i roroghagha tevambema i woenge Loi le dageraweko une.

¹⁶ Mbanja gharighari ghinda nuwandaiya ra tholo, ra tholo lolo laghiye regha e idae, na i vaemunjorunja la tholoko mbema emunjoru, na i kitena wogaithiko.

¹⁷ Loi va nuwaiya i vaemunjorunja le dageraweko, iya kaiwae va nuwaiya ra ghareghare wagi yawe ma tene i viviva le renuwanja, thavala thi wo le dageraweko ne thi vaidi une.

¹⁸ Dageraweko na tholoko mbe thi yaku vara, thi roghabana na ma valikaiwae Loi ne i kwan kaiwanji. Iya kaiwae thavala ghinda kaerova ra voru Loi e ghadidiye, valikaiwae ra wo vurigheghewe weinda la gharematuwo na ra roroghagha thovuyeko iya e ghamwandako.

¹⁹ Thovuyeko iyako ghagharematuwo ngoreiya yawalindake ghayange, i laweghathiinda na ra yaku na thovuye la yangeko le ghamba lawe iye Loi, iye ina i yaku Ghamba Yaku Bobomako Moli e tine, iya thi ligana e kwamako, ina maya mevathavatha ngoloniyeke e tine.

²⁰ Jisas iye i viva e ghamwanda na ve ru e Ghamba Yaku Bobomako Moli tine, kaiwae i tabo ravowovowo laghiye ngoreiya Melkisedek na iye ravowovowo mbanjake wolaghiye ma ele ghambako.

7

Ravowovowo Melkisedek utuniye

¹ Melkisedek iye ghemba Salem ghakinj na iye Loi Ramevoro Moli le ravowovowo. Mbanja Eibraham weiyangiya kinjima theghevarima thi gaiti na i kivwalangi, kaero i njoghanjogha e ghemba, Melkisedek i lavolevole na i dagewe inja, “Loi ghare e ghen.”

² Amba Eibraham i tena bigibigiko wolaghiye va ve mbaniko na i vakatha wabwiyaworo na i giya wabwira weya Melkisedek. Idake Melkisedek gharumwaru “Thanavu Rumwarumwaruniye ghakinj,” na idae reghava

“Salem lenji kinj,” gharumwaru “Vanevane gha Kinj.”

³ Melkisedek ramae na tinae mava thi rori mun ghanjiriuriu, na le viri na le mare ma tembe e utuutuniyeva. Amalaghiniye ngoreiya Loi Nariye, i tabo ravowovowo mbanake wolaghiye ma ele ghambako.

⁴ Wo hu thuwe Melkisedek idae i laghiye moli. Ghinda rumbunda laghiye Eibraham bigibigima va i mban e gaithiko tine i ten na wabwiyaworo na i giya wabwira weya Melkisedek.

⁵ Thiye uu Livai thi tabo na ravowovowo, na mbaro va inja Isirel gharighariniyeko wolaghiye tembe thi teniva lenji bigibigiko wabwiyaworo na thi giya wabwi regha wenjiya uu Livai. Iyake i emunjoru othembe thiye oghaghanjingiya uu Livai na ghanjiriuriu i mena weya Eibraham, va thi vakavakatha ngoreiyako.

⁶ Ko iyemaenge othembe Melkisedek iye ma Livai rumbuye ngoreiye va i mbana bigibigiko ghawabwi regha weya Eibraham, na Eibraham iye ghadagerawe i mena weya Loi, va i dage mwaewowe inja, “Loi i mwaewo e ghen.”

⁷ Ma ra numoghegheiwoŋa loloko i giya dagemwaewoko i laghiye kivwala iya i wo dagemwaewoko.

⁸ Na bigi reghava, ravowovowo uu Livai e tine iya thi mbanimba wabwi regha wenjiya Isirel gharighariniye, tenevole thi mare, ko iyemaenge Melkisedek, iye va i mbana wabwi regha weya Eibraham, ma e utuutuniye na i mare.

⁹ Na valikaiwae tembe ranjava ngoreiyake. Uu Livai thi mbanimba wabwi regha wenjiya

Isirel gharighariniye, ko mbaṅa Eibraham i giya wabwi regha weya Melkisedek, iyako ngoreiya uu Livai thi giya.

¹⁰ Valikaiwae ra utu ngoreiyako kaiwae mbaṅa Melkisedek i vaidiya Eibraham, Livai vama ina weya rumbuye Eibraham, vamba ina enge e madibae na vamba ma i yomara.

Jisas ngoreiya Melkisedek na i kivwalanḡiya ravowovowo mevivako

¹¹ Mosese va i giya Mbaro wenḡiya Isirel gharighariniye na ravowovowo uu Livai e tine thi njimbukikiya Mbaroko iyako kaiwoniye. Gharighari thi renuwaṅa Mbaro ne i varumwarunḡi. Ko iyemaenḡe ma valikaiwanḡi thi vakathanḡiya gharighari na thi rumwaru, amba Loi iṅa na ravowovowo mbe tomethi regha i yomara, iye ma ngoreiya Eron, ko mbe ravowovowova ngoreiya Melkisedek iye ravowovowo.

¹² Na thonḡo ravowovowo ma reghaova i yomara, tembe ngoreiyeva mbaro ma reghaova i yomara.

¹³ Ghanda Giyake iya ra utuuta utuniyeke, iye mbe uu regha loloniye na ma mbaṅa regha uuko iyako loloniye i tabo na ravowovowo na ma i vakatha mun vowo kakaiwoniye e ghamba vowo.

¹⁴ Kaero ra ghareghare ghanda Giya va i yomara Juda e gheuu tine na Mosese mava i utuṅa mun uuko iyako loloniye regha ne i tabo ravowovowo.

¹⁵ Budakai ma utuuta utuniyema noroke kaero i wowoya, ravowovowo ma reghaova regha kaero i yomara, iye ngoreiya Melkisedek.

¹⁶ Ma kaiwae i vamboromboroŋa Loi le mbaro na i tabo ravowovowo, ko iyemaenŋe va i tabona ravowovowo kaiwae vurighegheko iya e yawaliyeko, mane mbaŋa regha ikoko.

¹⁷ Kaiwae Buku Boboma e tine iŋa, “Ghen ne u tabo ravowovowo mbaŋake wolaghiye ma ele ghambako, ŋgorana Melkisedek iye ravowovowo.”

¹⁸ Iya kaiwae mbaro teuye kaero ma ele vurigheghe na ma valikaiwae i vakatha ngoreiya gharerenuwaŋako na ma e ghathovuye,

¹⁹ kaiwae Mosese le Mbaro ma i vakatha bigi regha na i rumwaru. Na Loi kaerova i giya la gharematuwo regha na iyako i thovuye kivwala Mbaro, na e la gharematuwoko iyako ra mena Loi evasiwae.

²⁰ Na mbowo bigi reghava, mbaŋa Loi i tuthiya Jisas na i tabo ravowovowo, mava i worawe bwagabwaga, ko iyemaenŋe va weiye le tholo. Mbaŋa uu Livai ghimoghimoruniye thi tabo na ravowovowo mava e tholo,

²¹ ko iyemaenŋe mbaŋa Jisas va i tabona ravowovowo, Loi va i tholo. Buku Boboma iŋa ngoreiyake:

“Giya kaerova i tholo na mane i viva le renuwaŋa, iŋa,
‘Mbaŋake wolaghiye na ma ele ghambako ghen ne ŋgorana ravowovowo.’”

22 Loi le tholoko kaiwae Jisas i tabo ravowovowo, iya kaiwae ra ghareghare wagiyaawe Jisas iye dagerawe thovuye i kivwala dagerawe teuye ghathovuye na iye i vaemunjoruṅa ghar-erenuwaṅa na ghinda ra vaidiya une.

23 Na reghava, mevivako ravowovowo thi mena uu Livai me lemoyo, kaiwae regha na regha mare va i kiten na ma valikaiwae i kaiwombela ghakaiwoko.

24 Ko iyemaenḡe Jisas ghambaṅa i tabo ravowovowo, i roghabana moli na ma e ghathithi.

25 Iya kaiwae valikaiwae moli noroke na mbaṅake wolaghiye ne i vamorunḡiya thavala thi mena weya Loi amalaghiniye e idae kaiwae yawaliye ma ele ghambako na mbe i nanḡonanḡo ghanjithalavu kaiwae.

26 Kaiwae ravowovowo laghiye ḡgoreiyako i vamboromboro la renuwaṅa. Amalaghiniye i boboma, ma e ghawonjowe, i kakaleva, i meghaghathi wenḡiya thari gharavakatha, na Loi kaerova i vanḡuvoreṅa yavoro moli na ve yaku e buruburu.

27 Iye ma ḡgoreiya ravowovowo laghiye mevivako. Mbaṅake wolaghiye mane mbowo i vakathakai enḡe vowo amalaghiniye le thari kaiwae, ḡgoreiya ravowovowo iya thi mena uu Livai, ko amba muyai i vowo gharighari lenji thari kaiwae. Amalaghiniye vambe ghamberegha vara i vatomwe gharighari lenji thari vowoniye, na vambe mbaṅara enḡe i vakatha mbaṅake wolaghiye kaiwae.

28 Mosese le Mbaro va i bigirawenḡiya gharighari, thiye thi njavovo, thi tabo ravowovowo laghilaghiye. Ko iyemaenḡe Mbaroko iyako e ghereiye Loi i tholo na iḡa Nariye i tabo na ravowovowo laghiye; iye gathanavu i rumwaru mbanake wolaghiye ma ele ghambako.

8

Jisas iye la ravowovowo laghiye

¹ Lama renuwaḡa laghiye moli na kaiwae wo utuutu ḡgoreiyake: la ravowovowo laghiye ḡgoreiyako mbe inawe. Amalaghiniye kaerova i voro e buruburu na i yaku Loi Ravwenyevwenye Moli ele ghamba yaku valivaḡa e uneko.

² Iye ravowovowo laghiye e ḡgolo boboma e buruburu, ḡgoloko iyako iye Mevathavatha ḡgoloniye emunjoru moli Loi va i vatad, na mava gharighari thi vatad.

³ Ravowovowo laghilaghiye regha na regha ghakaiwo i mbanimba gharighari lenji mwaewo na i vakatha lenji thari vowoniye weya Loi. Na ghinda la ravowovowo laghiye tembe ḡgoreiyeva, iye tembe i vowova bigi regha weya Loi.

⁴ Thonḡo mbe ina e yambaneke, mbala ma i tabo ravowovowo, kaiwae ravowovowo vambe inanji gheke thi vakavakatha vowo ḡgoreiya Mbaro le woranḡiya.

⁵ Ravowovowoke thiyake thi kaiwo e Mevathavatha ḡgoloniye e yambaneke ḡgoreiya buruburu ḡgalingaliya. Iyake kaiwae, mbanḡa

Mosese nuwaiya i vatada Mevathavatha gha Ngolo, Loi i dage vurigheghewe ija, “U njimbukiki na thovuye na ghavatavatad ngoreiya va ya vagharengema e ouko vwatae.”⁶ Ko iyemaenge Loi kaerova i tuthiya Jisas na iye i tabo ravowovowo, na le kaiwoko iyako i kivwalaŋgiya ravowovowo laghilaghiye me vivako lenji kaiwo. Dageraweko iya amalaghiniye va i vamidiko gharighari na Loi e ghanjilughawoghawo i thovuye kivwala dagerawe teuye, kaiwae Loi va i woraweya vaemunjoruko iyako na i dagerawe gharighari ne thi vaidiya ghathovuye laghiye moli.

⁷ Thongova dageraweko teuye mava e ghathari regha mun mbala dagerawe togha ma tembe e gharerenuwanava.

⁸ Ko iyemaenge Loi i thuwe vaidiya gharighari lenji thari amba i dageraweya dagerawe togha kaiwae, i dage ngoreiyake:

Giya ija, “Mbanja i menamenako ne ya vakatha dagerawe togha wabwi Isirel na wabwi Judiya kaiwanji.

⁹ Dageraweke iyake ma ngoreiya iyava ya vakathako wenjiya orumburumbunji mbananiye ya vighathi e nimanji na ya vanju ranjiyanji Ijpt e tine.

Ko iyemaenge thiye mava thi ghambugha dageraweko iyava ya vakathako iyako le ututu, iya kaiwae ghino Giya ya wogiya ghereingu wenji.

¹⁰ Iya dageraweko ne ya rovakathako wabwi Isirel kaiwanji ne ngoreiyake:

Ne ya woraweya lo mbaro e lenji renuwanako tine na thi ghareghare na ya rori e gharenji na thi ghambu. Ghino ne ya tabo lenji Loi na thiye thi tabo lo gharighari.

11 Na mbala ma valikaiwae, lolo regha tembe i vavaghare weva gheu regha Giya kaiwae, o regha i dage weya ghaghae na ina, 'Ghen mbala u ghareghareya Giya,' kaiwae gharigharike wolaghiye ne thi gharegharengo, othembe thiye mbema gharighari bwagaenge o thonjo e idaidanji.

12 Kaiwae lenji vakathako raraithari ne ya numoten, na lenji thariko mane tembe ya renuwanakikiva."

13 Mbanja Loi i utunja dageraweko togaha kaiwae, e kamwathiko dageraweko iyava i vakatha i vivako kaero i teuye. Na the bigiya kaero i teuye na i vwatha mbanja nasiye iko moli.

9

Loi ghakururu e yambaneke na e buruburu

1 Dagerawe teuye ghambaro vavana va inanjiwe kururu ghavakavakatha kaiwae, na ghangolo boboma vambe thi vatadiva e yambaneke.

2 Mbanja va thi vamidiya Mevathavatha Ngoloniye, thi livakwata kwama yangara na ghathinimba. E tine woluwolu iviva idae Woluwolu Boboma. E tine kadinjene weiye ghambanji

na tebol weiye bred boboma kaero thi vowo weya Loi.

³ Kwama yangaiwoniye thi livakwate e wolu-wolu reghava na woluwoluko iyako idae Wolu-wolu Boboma Moli.

⁴ E Woluwolu Bobomako Moli iyako e tine inisenis* ghaghamba nambu nambu va thi vakatha e gol na dagerawe ghabogis. Va thi monja gol iya e dageraweko ghabogis riwaeko laghiye, na e tine thi bigimbana bigibigi theghetowe: ghaninga manna ghauye thi vakatha e gol, Eron le umbwa kaero i mbuthuva na i rau, na vari debedenai variwo thovuthovuye iyava Loi i roriya dageraweko teuye ghautuutu e vwatanji.

⁵ E bogisiko vwatae nyao thovuthovuye theghewo thi wo Loi vwenyevwenyewaeko, vineinjiko i garubwa lughawoghawoko iya thariko ghaghamba raka. Ko iyemaenge mbanjake ma ghambanja na wo uturangiya nasiye na laghiye.

⁶ Mevathavatha Ngoloniye na bigibiginiyeko ghanjivakatha va ngoreiyevarako. Na mbanja regha na regha ravowovowo thi ruru e wolu-woluko iya i vivako na thi vakavakatha ghanjikaiwo kururu kaiwae.

⁷ Ko iyemaenge mbe ravowovowo laghiye enge ghamberegha i ruru e wolu-woluko iya theghewoniyeke tine. Theghathagha umbwara e tine mbe mbanjara enge vara i ruwe. Na ma valikaiwae i ru bwagabwaga, ko mbe i

* **9:4** Inisenis iye umbwa thiye butiye thovuye na modanji laghiye moli.

thina madibe amalaghiniye le thari kaiwae na gharighari tembe lenji thariva kaiwae, iyava thi vakathako na lenji renuwanja thinjaenge ma thari ngoreiye.

⁸ Woluwolu i vivama mbe ina e ghambae iya kaiwae amba ma kamwathi i mavu na valikaiwae gharighari thi ru na thi wa e Woluwolu Bobomako Moli tine. Iyake Nyao Boboma i vaghareinda iyako, mbanja dagerawe teuye mbe ina e ghambae ma tembe kamwathi na gharighari thi renawe na vethi ru Loi e marae.

⁹ Iyako ngoreiya goghaimba mbanjake iyake i yoyomara kaiwae. E mbanjake iyake mbe thi vakavakatha rakurukururu lenji mwaewo na thi vowoŋŋiya thetheghan, ko iyemaenge vakathake iyake ma valikaiwae i vanamwe gharighari gharenji na thi runwaru,

¹⁰ kaiwae vakathake iyake weiye ghaninga, munumu na thithu, ghanjimbaro na ghanjir-erenuwanja mbe i reŋa enge e ririwo. Vakathako iyako mbe ghanjimbanja, na i mena ghaghad mbanjake Loi kaerova i vugha kamwathi togha.

Krais madibae

¹¹ Krais kaerova i mena na iye ravowovowo laghiye, na kaerova i womena thovuyeke iyake. I ghathara Mevathavathako gha Ngolo iya i laghiye kiwala teuyeko na i thovuye moli; mava gharighari thi vatad e nimanji na ma yambaneke ngoloniye ngoreiye.

¹² Mbanjara na mbanjake wolaghiye kaiwae amalaghiniye kaerova i ru e Woluwolu Bobomako Moli tine. Ma ranjawa va i thina bu-

rumwaka na gout madibanji na i ru, ko iye-
maenye mbe amalaghiniye vara ghamberegha
e madibae i vamodo njoghainda thari e tine
mbanjake wolaghiye ma ele ghambako.

¹³ Thongo gharighari thi mbighi Loi e marae
ngoreiya lenji kururu ghambaro, ravowovowo i
thina gout na burumwaka ghimoru madibanji o i
thina burumwaka wevo thi njambu na vughauye
weiye mbwa na i tagaseura gharighariko thiyako
riwanjiwe. I vakatha gharighariko riwanji i
thina na mbighiwanjiko iko.

¹⁴ Ko iyemaenye Krai madibae i thovuye
kivwalangiya thiyako. Nyao Memeghabananiye
le vurigheghe e tine Krai tembe ghamberegha
vara i vatomwe na i mare na vowo weya
Loi. Amalaghiniye madibaeko iya i thavwiya
la vakatha vathariko mbighiwe iya modaya
mareko, i vanamwe gharenda na i kakaleva. I
vakatha ngoreiyako na ra tabo rakakaiwo weya
Loi e yawayawaliye.

¹⁵ Krai va i vanamwe dagerawe togha
righethoru kaiwe mbala thavala kaerova Loi i
kula wengi thi vaidiya thovuyeko iya memegha-
bananiye iya i dageraweko. Valikaiwe ra
wo dageraweko iyako kaiwe le mare kaerova
i yomara, na le mareko iyako i rakayathungiya
gharighari lenji thari, iya thi vakathako
mbanja vamba inanji dageraweko teuye e rabe-
abe.

¹⁶ Thongo amala regha i dagerawe weya
nariye na ne i robigiya le bigibigiko va-
vana le mare e ghereiye, ma valikaiwe

nariye i mbana dageraweko iyako bigibiginiyeko ghashada amalako i mare.

¹⁷ Kaiwae thongo amalako iyako amba e yawayawaliye, dageraweko iyako amba i yaku bwagabwaga. Wone mare i yomara ambane dagerawe ngoreiyako i tabo emunjoru.

¹⁸ Tembe ngoreiyeva iyake, dagerawe teuye mava thi vaemunjoru bwagabwaga, vambowo thetheghan i mare na e madibewaeko amba i vaemunjoruḡa.

¹⁹ Va thi vakatha ngoreiyake. Mosese va i utugiya Mbaroko utuutuniye wolaghiye wenḡiya gharighariko wolaghiye. Kaero i thina burumwaka madibanji weiye mbwa, tembe ngoreiyeva i liya thiyo sosoro thi vakatha sip vulivuliye na nana hisop yangae, amba i vanḡuthiya e madibema na i variriya Mbaro ghabuk na gharighariko wolaghiye.

²⁰ Amba Mosese iḡa, “Madibeke iyake i vae-munjoruḡa dageraweko iyava Loi iḡake hu ghambu.”

²¹ Mosese vambe i vakathava ngoreiyako, va i thina madibe na i variriya Mevathavathako Ngoloniye na bigibigiko iyava thi vakai-wonḡḡiko kururu kaiwae.

²² Ngoreiye, Mbaro iḡa bigibigiko wolaghiye thi vakatha na i thina e madibe na mbighiko iko moli. Na Loi mane i numotena thari thongo madibe ma i voru.

²³ Mevathavatha Ngoloniye iye bigiko iya emunjoruko moli ina e buruburu ngalingaliya.

Valikaiwae moli tembe thi vabobomanava bigibigiko ngoreiyako. Ko iyemaenge bigi emunjouruko iya inako e buruburu nuwaiya vovo thovuye moli iya i kivwala thetheghaniko vovoniye.

²⁴ Kraiis mava i ru e ngolo boboma gharighari va thi vatad e nimanji, iya emunjouruko ngalingaliya. Iye va veru e buruburu moli tine na e mbanake iyake i yomara Loi e marae ghinda kaiwanda.

²⁵ Kraiis va ve ru e buruburu, ko iye-maenge ma vambe ve ravovovowo enge ghamberegha ngoreiya Jiu lenji ravovovowo laghiye theghathegha regha na regha i thina thetheghan madibae na ve ru e Woluwolu Boboma Moliko tine.

²⁶ Kaiwae thonjo mbe i rovovovowo enge ghamberegha, mbene i ghataghatana enge viri, i ri mbananiye Loi va i vakatha yambaneke. Iye-maenge ma ngoreiye. Mbanake iyake mbanale ghambako i ghenetha, na amalaghiniye va i yomara mbe mbanara enge mbanake wolaghiye kaiwae, na mbe ghamberegha vara le mare e tine, i rakayathu thari.

²⁷ Na reghava, lolo regha na regha mbene mbanara enge i mare, na e ghereiye ve kot.

²⁸ Tembe ngoreiyeva Kraiis vambe ghamberegha vara i vatomwe na i mare ngoreiya vovo gharighari lemoyo lenji thari. Na tembene i yomarava mbanaiwoniye, ma ngoreiya gharighari lenji thari ghavanamwe kaiwae, ko iyemaenge thavala thi roroghagha amalaghiniye kaiwae ne i vamorungi.

10

Krais va i mare mbanara na mbanake wolaghiye kaiwae

¹ Kaiwae Mosese le Mbaro iye thovuyeko iya amba i menamenako mbema ngalingaliya enge, na iye ghathuwathuwa amba ma ngoreiya thovuyeko moli. Iya kaiwae Mbaro ma valikaiwae i vanamwengiya gharighari thi mena thi kurukururu na thi rumwaru, othembe theghathegha regha na regha thi vakavakatha vowo.

² Thongo mbema emunjoru gharighariko va thi kurukururu weya Loi thi vowo mbanarako na kaero i thavwiya thu lenji thari, mbala tembe ma thi rerenuwanava e gharenjiko thiye thi thari, iyako mbala i vakatha thi viyathu vowo ghavakatha.

³ Ko iyemaenge vovoko iya thi vakavakatha theghathegha regha na reghako i vavanuwoviri wengi thiye thari gharavakathanji.

⁴ Kaiwae burumwaka ghimoghimoru na gout madibanji ma valikaiwae i rakayathu gharighari lenji thari.

⁵ Iya kaiwae, mbanja Krais kaero ghambanja i njama e yambaneke, i dage weya Loi inja:

Thetheghan ghanjivowovowo ma nuwana nuwaiya, ko iyemaenge va u vivatharaweya riwanguke u wovengo ya vakaiwona kaiwan.

⁶ Thi nambwa vowo na thari vovoniye ma u wararina.

⁷ Ko amba ghino yaŋa, “O Loi, ghinoke, ya mena na ya vakatha len renuwaŋana, ngoreiya kaerova thi rorinjona Buk Boboma e tine.”

⁸ (Mbaro i woraŋgiya gharighari thi vakathaŋgiya vowoko thiyako.) E rororiko iyako tine, iviva iŋa, “Thetheghan vowoniye, thi ŋambwa vowo, na thari vowoniye ma nuwaniya na ma u warariŋa.”

⁹ Ko amba iŋa, “Ghinoke, ya mena na ya vakatha len renuwaŋana.” Iya kaiwae kamwathima i vivama kaero i rakayathu na kaero i vamidiya kamwathi theghewoniye.

¹⁰ Kaiwae Jisas Krai kaerova i mena na i vamboromboro Loi le renuwaŋa, i wogiya ghamberegha riwae na i vowo mbaŋara na mbaŋake wolaghiye kaiwae, i vabobominda.

¹¹ Mbaŋake wolaghiye ravowovowo regha na regha thi ndeghati na thi vakavakatha kururu kaiwoniye na mbaŋathanari thi vowo vovwatha mbe vowo regha enge, ko iyemaenge vowoko iyako ma valikaiwae i thavwiyaŋa thari.

¹² Iyemaenge Krai vambe i vakatha enge vowo regha gharighari lenji thari kaiwae, na vowoko iyako ele vurigheghe mbaŋake wolaghiye ma ele ghambako, ko amba i yaku Loi ele valiŋa e uneko.

¹³ Mbaŋake mbe inawe i roroghagha ghaghad Loi i biginjonaŋgiya ghathighiya e gheghe raberabe.

¹⁴ Valikaiwae i roroghagha ngoreiyako kaiwae vowo vambe regha enge vara i vakatha, na ghinda thavala kaero i vabobominda, kaero

i vanamwe wagiya weinda na ra rumwaru e marae mbanjake wolaghiye ma ele ghambako.

¹⁵ Nyao Boboma tembe i utunava weinda iya utuutuke iyake. I viva inja:

¹⁶ Giya inja, “Mbanja muyaiko ne ya vakatha dagerawe kaiwanji ngoreiyake. Ne ya woraweya lo mbaro e gharenji na thi ghareghare, na ya rori e lenji renuwanako na thi ghambu.”

¹⁷ Na mbowo i gotubweva inja, “Lenji thari na lenji vakatha rarithari mane tembe ya renuwanakikiva.”

¹⁸ Iya kaiwae, mbanja Loi kaero i numotena gharighari lenji thari, ma tembe valikaiwaeva ravowovowo i vakathava vowo thari kaiwae.

Utu vavurigheghe ghatanaghathi kaiwae

¹⁹ Iya kaiwae, lo bodaboda, Jisas Krais madibae kaiwae valikaiwae weinda la gharematuwo ra ru e Woluwolu Bobomako Moli tine Loi e marae.

²⁰ Jisas kaero i vughi weinda ghamba ruruko ghakamwathi togha. Iye yawali ghakamwathi, na kwamako iyava thi livakwate na i gana Woluwolu Bobomako Moli ghaghamba ruwe mbanjake kaero i mavu. Va i mavu Jisas e riwae na i mare kaiwanda.

²¹ La ravowovowo laghiye kaero inawe, iye i njimbukikiya Loi le ngolo.

²² Wo ra wa weya Loi ghadidiye e gharendake thi emunjoru na wonjowe ma inawe na la lonweghathi mbe i vurigheghe. Ra wawe kaiwae kaero i vanamwe gharenda na la thari

mbighiwae iko, na kaero i thavwiya riwanda e mbwa thovuye.

²³ Wo ra vatada la lonweghathike laghiye weya Loi na ra vikikighathi kaiwae ra ghareghare nevole i giya thovuye weinda kaero ra utunangi, kaiwae ra vareminja Loi ne i vamboromboro ngoreiya le dageraweko.

²⁴ Na wo ra rerenuwana na ra vevavurighhegenaina na ra vegharethovuinda na ra vakatha vakatha thovuye.

²⁵ Thava ra viyathu mevathavatha thanavuniye, ngoreiya vavana thi vakavakatha. Iyemaenge ra veutu vavurigheghe weinda na ra vakatha mbela iyako kaiwae Giya le njoghama kaero i ghenegenetha.

²⁶ Thongo kaero ra ghareghareya totoko iya emunjoruko ko iyemaenge mbema nuwandake nuwaiya ra vakavakathava thari, ma tembe vowo reghava inawe na ne i thavwiyathu la thari.

²⁷ Iyemaenge mbema weinda enge la mararu na ra roroghagha Loi ne i vanivanaina na i vanjuraweinda e ndigheko dayaghawaeko laghiye e tine, iya Loi ne i nambunjiya ghathighiyakowe.

²⁸ Thelolo regha i botewo Mosese le Mbaro na ragovambwara theghewo o thegheto, ghalithi mbe mare enge, mane gharenji i njawe.

²⁹ Ko iyemaenge thongo lolo regha i wonjonanona Jisas na ina, "Iye ma Loi Nariye ngoreiye," o thongo i wovanasinasiyena madibeko iya i vaemunjoruna dageraweko togha na i thavwiyathu la thariko, o thongo lolo regha

i utuvathari weya Nyao Gharegharethovuniye, loloko iyako ghalithi ne i laghiye moli i kivwala loloko i botewo Mosese le Mbaroko ghalithi.

³⁰ Kaiwae ra ghareghare Loi ija, “Ghino wombereghe ya liya thoru na ya lithi wenga lemi vakathana raithari modae.” Na tembe ijava, “Giya ne i ghatanjiya le gharighari.”

³¹ Ghamba mararu laghiye moli thonjo Loi e yawayawaliye i laweghathiinda lithi kaiwae.

³² Wo hu renuwajanjogha mbanja me vuvako, va ngoronga ghemi, mbananiye Toto Thovuye manjamanjalaniye i woya wenga. Vuyowo lemoyo va thi ghaninjonanjonanga na hu vaidiya viriniye, iyemaenge hu ghatanaghati na hu ndeghati vurigheghe.

³³ Mbanja vavana va thi vandeghathinga wabwi e maranji amba thi utuvathari e ghemi na thi vakatha vathari wenga. Na mbanja vavana hu ndevanga wenjiya ghamune thi vakatha ngorake wenji na hu thalavungi.

³⁴ Mbanja thonjo va thi vanguruwongiya ghamune vavana e thiyo, gharemi i njawengi na hu vakatha ghanjithalavu. Mbanja rambarombaro va thi mban bwagabwaga lemi bigibigi, hu warari, kaiwae hu ghareghare vwenyevwenye moli mbe ina wenga, iya i meghabanako.

³⁵ Iya kaiwae thava hu ndeiteta lemi gharematuwona, kaiwae iyana ne i womena modami laghiye,

³⁶ na wo hu ghatanaghati na hu vakatha Loi le renuwana na budakaiya le dagerawe hu wo e

ghemi.

³⁷ Kaiwae mbaṅa nasiye moli, iya thela i menamenako i vutha mane i vuyowo.

³⁸ Ko iyemaenṅe lo gharighariko iya thi rumwaruko, ne e yawayawalinji kaiwae thi loṅweghathi, na thonṅo regha i njogha e ghereiye, mane ya warari kaiwae.

³⁹ Ko iyemaenṅe ghinda ma gharighari thi ndendenjogha e ghereinji na thi mukuwongi, iyemaenṅe ghinda kaero ra loṅweghathi na ra vaidiya vamoru.

11

Loṅweghathi utuutuniye

¹ Loṅweghathi gharerenuwaṅa ṅgoreiyake. Ra ghareghare wagiyaṅe emunjoru thovuyeko iya ra roroghaṅa kaiwaeko ne ra vaidi. Othembe ma ra thuwe e marandake, iyemaenṅe ra ghareghare wagiyaṅe mbe inawe.

² Gharighari me vivako lenji loṅweghathi kaiwae Loi i wovathovuthovuyenṅi.

³ La loṅweghathi e tine ra ghareghare Loi va i vakatha yambaneke na buruburu e ghaliṅae, iya kaiwae budakaiya ra thuwe e marandake Loi va i vakatha e thebigiya ma ra thuwe.

⁴ Loṅweghathi e tine Eibol i vakatha vowo thovuye i voro weya Loi na iyako i thovuye kivwala Kein le vowo. Le loṅweghathi kaiwae Loi i warariṅa na i wovarumwarumwaruṅa, kaiwae Loi mbe ghamberegha i wovarumwarumwaruṅa le

vowoko. Le vareminjeko kaiwae othembe kaero i mare, iyemaenge le lonweghathiko i vavurigheghenda.

⁵ Inok le lonweghathi kaiwae Loi mbe i vanqu vara bwanabwana, mava i mare. Mava thi vaidi muna riwae kaiwae Loi vama i yovanqu, na amba muyai i yovanqu. Buk Boboma inja Loi inja, “Ya warari Inok kaiwae.”

⁶ Thongo ma e la lonweghathi Loi mane i warari kaiwanda. Kaiwae thela thongo nuwaiya i mena weya Loi, wo i lonweghathi Loi inawe na Loi i giya modae thovuye wenjiya thavala thi tamwe.

⁷ Lonweghathi kaiwae Nowa i vandenje na i wovatha Loi ghalinae, mbanja va i vanuwoviri bigibigiko ne thi yomara e ghamwaeko kaiwanji, iya amba ma valikaiwae i thuweko. Kaiwae Loi ghayavwatata i laghiye weya Nowa, i ghambugha Loi le renuwanako na i vatada wanga amalaghiniye na le nganga thi vaidiya vamoruwe. Nowa le vakathako i woranjiya gharighari e mbanako iyako raraitharangi, na kaiwae amalaghiniye i lonweghathi Loi inja, “Nowa iye lolo rumwarumwaruniye.”

⁸ Eibraham le lonweghathi kaiwae i vakatha i ghambugha Loi le renuwanja mbanja i kularanjiya e ghambae na i wa e vanautuma regha Loi i dagerawewe na i vatomwewe, othembe mava i ghareghare the valivanga i renjakowe.

⁹ Le lonweghathi kaiwae i mebobwari dagerawe ghembaniye e tine, i ghenaghena e yanavanjavanga tine. Aisake na Jeikob vambe thi yakuyakuva ngoreiyako na Loi tembe i

dageraweve wengi na thi yakuna valivangako iyako.

¹⁰ Eibraham i mebobwari gheko kaiwae va nuwaiya moli wone i yaku e ghemba ghambaghimbaghi memeghabananiye, iya Loi i renuwanjako na i vatad.

¹¹ Eibraham le lonweghathi kaiwae i vakatha Loi le vurigheghe e tine thi vaidiya ngama othembe amalaghiniye vama i amalaghisari na levo Sera i kwama. Amalaghiniye va i vareminja Loi valikaiwae i vamboromboro le dageraweko.

¹² Othembe vama i amalaghisari moli na kaero i rovala, amalaghiniye ghamberegha e madibae, orumburumbuye lemoyo moli, lenji ghanaghanagha ngoreiya ghitarra e buruburuko na kerakera e njighiko ghadidiye ma valikaiwae ra vaona.

¹³ Gharighariko wolaghiye thiyako vambe thi longalonga vara lonweghathi e tine ghaghad vethi mare. Bigibigiko Loi va i dageraweko kaiwanji mava regha mun i vaidi, ko iye-maenje thi ghimaraghaoko e ghamwanjiko i bwagabwaga moli wengi na thi wararija ne i yomara ngoreiye. Mava thi monjinaja na thiya, "Ghime bobwari na ra longa bwagabwaga e yambaneke."

¹⁴ Gharighari iya thi utuna ngoreiyako i worangiya thiye thi tamwetamweya vanautuma ne thi wo na ghambanji moli.

¹⁵ Thongo va thi rerenuwaja vanautumako va thi iteteko kaiwae, mbala kaero va thi raka njogha.

16 Iyemaenge vanautuma thovuye moli ghar-erenuwana mbe ina vara wenji, iye buruburu ghembaniye. Iya kaiwae Loi ma i monjina na thongo thiya iye lenji Loi, kaiwae kaero i vivatharaweya ghemba kaiwanji.

17-18 Lonweghathi kaiwae Eibraham i vatomweya nariye Aisake vowo kaiwae, mbanja Loi i mando. Loi va i dagerawewe na inja, "Weya naru Aisake nevole orumburumbu thi yomara", iyemaenge va i vatomweyathu moliya nariye mbe reghaenge vowo kaiwae.

19 Eibraham va i ghareghare Loi valikaiwae i vakatha Aisake na i thuweiru mare e tine na tembe e yawayawaliyeva. Na valikaiwae ranja mbanja Loi i dagetena Eibraham na thava i vakowana Aisake yawaliye, iyako ngoreiya Eibraham i vanjunjogha nariye mare e tine.

20 Lonweghathi kaiwae Aisake i giya le nganga, Jeikob na Iso ghanjidagemwaewo mbanja i menamenako kaiwae.

21 Lonweghathi kaiwae, mbanja Jeikob le mare vama evasiwae, i giya Josep le nganga ghimoghimoru theghewo ghanjidagemwaewo mbanja i menamenako kaiwae. Na vama i woenge le pwasike, i ndevadede ghamba vighathiko kaero i kururu weya Loi.

22 Lonweghathi kaiwae, mbanja Josep le mare vama i gheneghenetha, inja, "Nevole mbanja regha amba wabwi Isirel thi raka rangi Ijpt," na i giya ghanjimbaro nevole e mbanako iyako thi mbana wokiwokiyeko na thi raka rangi.

²³ Lonweghathi kaiwae Mosese tinae na ramae weinji lenji gharematuwo thi raka kinjiko le mbaro na narinjiko le viri e ghereiye thi wothuwele e ngolo tine manjala umboto e tine, kaiwae ngamako ghayamoyamo va i thovuye moli.

²⁴ Lonweghathi kaiwae i vakatha Mosese, mbanja vama i laghiye mava nuwaiya gharighari thinja amalaghiniye kinjiko yawarumbuye nariye.

²⁵ Va i renuwanja nuwaiya weiyangiya Loi le gharighari wo thi ghatana viri, na thava i wararija thari thanavuniye ghawarari, iya ma ghambanjako molao i vawararija.

²⁶ I renuwanja na i dagewe ghamberegha, “I thovuye enge Mesaiya kaiwae na gharighari thi utuvathari wengo, na i thari enge Ijpt vwenyevwenyeniye ya vwenyevwenyewe.” Va i renuwanja ngoreiyako kaiwae e marae vambe i vonjimbughathi vara modoko iya Loi ne i giyakowe.

²⁷ Le lonweghathi kaiwae Mosese i iteta Ijpt, mava weiye mun le mararu othembe kinjiko thonjo i gaithi. Ranjaenge vama i thuweya Loi iya ma ra thuwe e marandake iya kaiwae i rombelenge.

²⁸ Lonweghathi kaiwae i vakatha Thaga Valanani na i vauna sip madibae e mbanjanjilako vwatanji na ghaumbwaumbwa vanja na vanja, na mbala thava Mareko gha Nyao i gabongiya Isirel lenji nganja ghimoghimoru viri vivangi.

²⁹ Lonweghathi kaiwae Isirel thi rakalawa e Njighi Sosoro ngoreiye thi rakalawa e manjo; ko

iyemaenge mbaņa Ijpt thi mando na thi vakatha ngoreiya Isirel methi vakathako, njighiko i wovululungi na thiya munumare.

³⁰ Lonweghathi kaiwae Isirel thi vaghiliya Jeriko ghagana mbaņa regha na regha na ghepirininji e tine ganako i maviri.

³¹ Lonweghathi kaiwae i vakatha Reihab, iye wevo i mbana riwae modae, mava i mare weiyangiya Jeriko gharighariniye thi goriwoy-athu iya Loi va i mukuwongiko, kaiwae va i vanguruwongiya Isirel rakelakela theghewo ele ngolo na i thalavungi.

³² Wone ya utunava the utuutu? Ma mbaņa i vatomwe na valikaiwae ya utunava Gidiyon, Barak, Samson, Jepta,* Deivid, Samuwel na ghalinae gharautu utuutuninji e ghemi.

³³ Lenji lonweghathi kaiwae vavana thi gaithi wenjiya vanautuma vavana na thi kivwalangi, vavana thi mbaronja na thovuyengiya ghem-baghema, vavana thi vaidiya Loi le dagerawe une, vavana thi vigana laiyan ghae,

³⁴ vavana ndighe le vurigheghe ma bolae ina e riwanji, vavana ghanjithighiyako iya nuwanjiya thi gabongi e gaithiko ghaghalithi thi voitetengi, vavana lenji njavovo e tine thi vaidiya vurigheghe, vavana gaithi e tine thi vurigheghe moli na thi kivwalangiya valivanja regha lenji ragagaithi na thi vonjogha.

* **11:32** Va i vivako Barak iye va Jiu gharighariniye lenji randeviva regha. Iye i viva e lenji gaithi na thi vakatha ghanjithighiya na thi dobu (Ragh 4 na 5). Jepta va ragagaithi laghiye moli. Va mbaņa regha iye Israel gharighariniye lenji randeviva.

³⁵ Wanakau vavana lenji bodaboda vavana thi thuweiru mare e tine na thi vanjunjoghanghi. Ko iyemaenge gharighari vavana ghanjithighiya thi tagavotagamena wengi na thi mare. Na othembe ghanjithighiyako thiya, "Thongo hu ndeghereiyewana Loi ne wo rakayathunga," iyemaenge thi botewoyathu, kaiwae nuwanjiya thuweiruva na thi wo yawaliko memeghabananiyeko.

³⁶ Vavana gharighari thi vaviringi na thi liya thiyo vurigheghe thi yabibingiwe; vavana gharighari thi ngaringi e sen na thi vanguruwongi e thiyo.

³⁷ Vavana gharighari thi tagavavamarengi e vari; vavana thi sowo teningi na vavana thi govamarengi e gaithi ghaghalithi. Vavana mbema thi rakaraka lolonga enge, thi njimbo sip na gout njimwanji, thi tabo mbinyembinyengu, thi vakavakatha viri wengi na ma thi ghana ghanjighari.

³⁸ Va thi vovo lolonga e vurivuri vwatavwata e valivanga ma mbwaniye, e ououko vwatawatanji na thi ghenaghena e mangavari na e therimbun. Yambaneke gharighariniye thi vakatha vathari wenjiya ralonwelonweghathiko thiyako na thi worangiya thiye ma e lenji thovuye na valikaiwae thi yaku na regha weinjiyangi.

³⁹ Gharigharike vara wolaghiye thiyake lenji lonweghathi kaiwae Loi i wovathovuthovuyenangi. Iyemaenge thovuyeko iya Loi va i dageraweko mava thi vaidi,

⁴⁰ kaiwae Loi va i renuwanja wo i woraweya

thovuyeko moli kaiwanda. Mava nuwaiya thiye wo thi thovuyekai, ko iyemaenge nuwaiya thiya na ghinda ra rumwaru na regha.

12

Loi iye ramanda na ghandaravathanavu thovuye

¹ Iya kaiwae ralonwelonweghathiko thiyako thiye ngoranjiya wabwi laghiye thi rovaghiliyainda na thi ghewainda, valikaiwae weinda la ghatanaghathi wo ra ruku lonweghathi e ghakamwathi na i ghembeya ghamwandako. Bigibigiko wolaghiye iya i ganeindake na ma valikaiwanda ra rukuna thovuye, weiye thari thanavuniye i laweghathiinda ra bigiyathu.

² Na marandake mbe ra vonjimbughathi vara Jisas, iye la lonweghathike righethoru na ghar-avanamwe. Iye va i ghatanaghathigha kros viriniye na mava i rerenuwana monjinaniye, kaiwae i ghareghare warari laghiye mbe ina e ghamwaeko tene ve vaidi. Na e mbanake iyake i yaku Loi ele gamba yaku vwenyevwenye tine valivanja e uneko.

³ Wo hu renuwana vuyowoko va i ruwoko, Jisas, amalaghiniye va i ghatanaghathi ghathari gharavakatha lenji vakatha vathariwe, iya kaiwae ghemi thava hu gharelaghilaghi na hu viyathu lemi gamba ndeghathina.

⁴ Kaiwae ghemi mbe inamiwe hu rorovurigheghe weimi thari thanavuniye na

gharighari thi thighiyawananga, ko iyemaenenge ghemina regha amba ma i mare.

⁵ Tha huya njavovo na kaero hu renuwana vaghalawa ghamiutu vavurigheghe iyava thi rori e Buk Bobomako tine? I dage wenjiya le nganga ngoreiyake,

Narungu, thonngo Giya i vathanavunge, thava u utu na unja ma e uneune, na thonngo i govambwara len thari, thava len rovirigheghena i thalativawe.

⁶ Kaiwae Giya gharighariko iya i gharethovuko wenji i vathanavungi, na gharighariko iya ghareko wenji ngoreiya le nganga, i vatomweya kamwathi wenji.

⁷ Mbe hu ghatanaghatigha virina hu vavaidina, kaiwae e tine Loi i vathanavunga. I vakatha ngoreiyako wenga kaiwae ghemi ngoreiya le nganga. Thare ngama regha inawe na ramae mane i vathanavu? (Nandere.)

⁸ Loi le ngangake wolaghiye i vathanavungi. Thonngo ma i vavathanavunga, gharerenuwana ngoreiye ghemi ma le nganga moli ngoreiye, ko iyemaenenge ghemi ngoreiya kamwathi gamaganiye.

⁹ Na tembe ngoreiyeva, oramanda e yambaneke mbe thi vavathanavuindava na ra yavwatatawanangi. Iya kaiwae mbala ra vatomweinda emunjoru weya Ramanda e buruburu le vavathanavuko iya i giya ko weinda na ra vaidiya yawalinda.

¹⁰ Oramanda mbe mbanja ubotu enge thi vathanavuinda; ko iyemaenenge Loi i

vathanavuinda la thovuye kaiwae, nuwaiya ra boboma ngoreiya amalaghiniye i boboma.

¹¹ Mbanja ra vavaidiya vathanavu, e mbanjako iyako ghaminanda i thari, ghaminanda ma i warawarari. Ko iyemaenge mbanja muyai amba ra thuweya une ve rangi thavala Loi i vavathanavu wenji i vanamwenji na ghanjithanavu i rumwaru na lenji yakuyaku tembe ngoreiyeva.

¹² Thava hu njavovo. Iyemaenge hu vavurighegheva lemi lonweghathi,

¹³ na mbe hu ghao e ghamwamina. Thongo ne hu vakatha ngoreiyako, iya ghamunena iya lenji lonweghathi i njavovo mane thi thari moli, ko iyemaenge ne thi vaidiva lenji vurigheghe.

Vavathanavu na vavurigheghe

¹⁴ Hu mando na lemi yakuyaku i thovuye wenjiya gharigharike wolaghiye weiye gharemalili. Na hu mando hu rovurighegheja thanavu thovuye moli ghavakatha. Kaiwae thongo ghandathanavu ma i rumwaru mane valikaiwanda ra thuweya Giya.

¹⁵ Hu njimbukikinga na thava ghemina regha i ndeiteta Loi le mwaewo bwagabwaga. Na tembe ngoreiyeva thava ghemina regha i vakatha thari wenjiya ghaune, iwaenge ne ngoreiye watheliliye iya i mbuthu na laghiye moli, na ele ghambako tembe ralonwelonweghathi i ghanagha ne thi vakathava thari na thi mbighi Loi e marae.

¹⁶ Hu njimbukikinga na thava ghemina regha i vakavakatha yathima thanavuniye. Na thava

ghemina regha i vakatha ngoreiya Iso, iye mava Loi gharerenuwana inawe, va mbe ghaningama mbanara enge kaiwae i giyayathu viriviva ghabebe mbalava i mena weya ramae.

¹⁷ Na kaero hu ghareghare va mbanara regha nuwaiya i wo dage mwaewo weya ramae mbanara i menamenako kaiwae, ko iyemaenge ramae i vaghareghareya dage mwaewoko iyako. Othembe Iso va i rani vwayata dageraweko iyako kaiwae, iyemaenge ramae mava valikaiwae i viva le renuwana.

¹⁸ Hu njimbukikinga ngoreiyako, kaiwae iya ghinda ra vaidike ma ngoreiya thiye me vivako methi vaidi. Wabwi Isirel va thi mena thi vutha e yambaneke ouniye Sainai amba thi thuweya ndighe i rara, ngalili i poku na i vakatha i momouwo na i roviri,

¹⁹ na thi lonweya mema ghalinae laghiye. Na tembe thi lonweva Loi ghalinae, i vakatha thi mararu laghiye na thi dage weya Mosese thiya, "Thava tembe i utuutuva weime na wo lonweya ghalinae."

²⁰ Kaiwae mava nuwanjiya ghalinaeko iyava inako, "Thongo lolo o thongo thetheghan regha i vurighathigha ouke iyake ne thi tagavamare e vari."

²¹ Bigiko iyava thi thuweko ghayamoyamo i maramararu moli iya kaiwae Mosese inja, "Mararu kaiwae ya tage."

²² Iyemaenge ghinda kaero ra vutha e Ou Saiyon, iye Jerusalem, ina e buruburu, iye Loi e yawayawaliye ghambae. Kaero ra thuwenjiya

nyao thovuthovuye, mbunja alalamango thi mevathavatha na thi warawarari.

²³ Kaero ra mena ra tubwe ekelesiya e tine na ngoranda Loi nariye gamau, na i rorinjona idanda e buk tine e buruburu. Kaero ra mena weya Loi iye gharigharike wolaghiye ghanjira-gatha. Na ra mena ra tubwe wenjiya gharighari rumwarumwaru mevivako, thavala kaerova thi mare na Loi i vanamwenji na thi rumwaru.

²⁴ Kaero ra mena weya Jisas, iye va i vamidiya dagerawe togha gharighari na Loi e ghanjilughawoghawo, na madibae i voru i vaemunjoruna dageraweko togha iyako. Eibol madibae va i dobu e thelauko vwatae i woranjiya gharaga-gaithi ne e ghalithi, ko iyemaenge Jisas madibae va i voru i woranjiya Loi i numotena la thari.

²⁵ Hu njimbukikinga na thava hu botewotho Loi le utuutuko wenga. Thavala mevivako methi botewo utu vurighegheniye, iya lolo va i dage wenji e yambaneke, mava thi voiteta ghanjilithiko. E mbanake iyake Loi i giya utu vurighegheniye i njama e buruburu, na thongo ra wogiya ghereindawe, ne ngoronga rana na ra voiteta lithiko iyako?

²⁶ Va e mbanako iyako i utu na le utuko i vakatha mbarimbariri e yambaneke ko iye-maenge e mbanake iyake kaerova i dagerawe inja, “Mbowone mbanarava ya vandindingiya yambane na buruburu.”

²⁷ Na mbowo inava, “Mbowo mbanarava” i woranjiya emunjoru bigibigike thiyake mbowone thi mbarimbaririva — thiye iyava Loi

i vakathangiko na ra thuwe e marandake — ne thiko. Iyanjaniya ma valikaiwae i mbarimbariri thi meghabana.

²⁸ Ghinda kaero ra wo ghamba mbaroko iya ma valikaiwae i mbarimbaririko, iya kaiwae weinda la vata agowe ra kururu weya Loi ngoreiya amalaghiniye i wararijako. Ra kururu weinda la yavwatata na la mararu,

²⁹ kaiwae la Loi iye ngoreiya ndighe valikaiwaya i nambuyathu bigibigike wolaghiye.

13

Utu vavurigheghe vavana

¹ Gharethovu thanavuniye hu vakatha valana wengiye lemi valiralonjwelonjweghathi ngoreiya thiye lemi bodaboda.

² Ne hu nderenuwana valawe mbe hu kula vathangiya bobwari e lemi ngolongolona. Vavana va thi vakatha ngoreiyako na thi kula vathangiya nyao thovuthovuye, ko iye-maenge mava thi ghareghare thela i wo nyao thovuthovuye iya thi kula vathangina.

³ Hu renuwajakikingiya ghamune inanji e thiyo hu vakatha thalavu wengi na ghayamoyamo ngoreiya ghemi inami e thiyo weimiyangi. Na ngoreiya ghamune thi ghatana viri, hu renuwajakikingi na ghayamoyamo ngoreiya ghemi tembe hu vaidiva iya viriko iyako.

⁴ Ghe iye bigi laghiye moli, iya kaiwae gharigharike wolaghiye valikaiwae thi yavwatatawana. Ghemi ragheghe lemi ghe

mbe i thina na thava yathima thanavuniye i vambighiya. Thavala thi vakatha yathima thanavuniye Loi ne ve ghathangi.

⁵ Mani ghagharethovu thava i ngara yawalim-ina ghalongalonga, ko iyemaenge the bigiya inawe hu vaidi mbema hu warariya enge. Kaiwae Loi kaerova i utuvao weinda ghanjimbukikinga inja;

Ma mbanja regha ya itetenga, ma mbanja regha ya ghene viyathunga.

⁶ Iya kaiwae valikaiwae weinda la gharematuwo rana;

Giya iye wo Rathalavu,

iya kaiwae mane ya mararu.

Ma ya rerenuwana budakaiya thongo gharighari thi vakatha e ghino.

⁷ Hu renuwanakikingiya thavala va thi ndeviva ekelesiyana e tine, thiye va thi utuna Loi ghalinae wenga. Yawalinji ghalongalonga na lenji lonweghathi une wo hu renuwangani, na mbala ghemi lemi lonweghathina ngoreiya thiye lenji lonweghathi.

⁸ Jisas Krais mbe reghaenge vara, menda, noroke na mbanako wolaghiye ma ele ghambako.

⁹ Thava vavaghare mbe tomethi na tomethi thi wo nuwami na hu roiteta emunjoruna. Ko iye- maenge hu vatomwenga enge Loi ele mwaewo bwagabwagana iya ne i vavurighesha yawalim-ina. Thavala va thi ghambu ghaninga ghambaro mava thi vaidiya yawalinji ghalavuwe mun.

¹⁰ Mbe e la ghamba vowo, ko iyemaenje vowoniye thavala va thi kaiwo e Mevathavatha Ngoloniye ma valikaiwae thi ghana uneko.

¹¹ Mbanja ravowovowo laghiye i thiniruwo thetheghan madibae e Woluwolu Bobomako Moli tine na i vowo gharighari lenji thari kaiwae, ko iyemaenje thetheghaniko thi worangiya eto ngoreiya ma gharighari thi yakuwe na thi nambuwe.

¹² Iyake kaiwae Jisas vambe i mareva e valivanja ma gharighari thi yakuwe — e gana ghereiye na mbe ghamberegha vara e madibae i vanamwengiya le gharighari na thi rumwaru Loi e marae.

¹³ Iya kaiwae ghinda ra raka iteta la ghamba yakuke na ra raka e gana ghereiyeko weya Jisas na thi vamonjinanainda ngoreiya amalaghiniye va thi vamonjinanako.

¹⁴ Ra iteta ghamba yakuke iyake kaiwae ghinda ma ghambanda memeghabananiye ina e yambaneke, ko iyemaenje ra roroghagha ghembako iya amba i menamenako kaiwae.

¹⁵ Iya kaiwae mbanjake wolaghiye weya Jisas ra giya la vowo weya Loi na vowoko iyako iye tarawa, e ghaendake ra wovavwenyevwenyenja amalaghiniye idae.

¹⁶ Tembe ngoreiyeva, thava hu renuwanja valawe hu vakatha thanavu thovuye wengiya ghamunena na lemi bigibigi vwelawavwelawa. Thanavu ngoranjijako ngoreiya vowo Loi i warari kaiwanji.

¹⁷ Hu ghambugha lemi randevivana lenji ututu na hu yaku e lenji mbarona raberabe, kaiwae

unemina ele valivanga thi njimbukikinga na lenji kaiwoko iyako utuniye nevole thi utuja weya Loi. Thongo hu ghambugha lenji utuutuko, ne weinji lenji warari thi kaiwo; ko thongo nandere, gharenji ne i vuyowo na mane hu vaidiya thalavu thovuye lenji kaiwoko e tine.

¹⁸ Mbe hu nanngonango kaiwame. E gharemeke tine moli wo ghareghare lama vakatha i rumwaru, kaiwae mbanake wolaghiye nuwameiya yawalimeke ghalongalonga mbe i thovuye vara.

¹⁹ E gharenjugeke laghiye ya nango vurigheghe e ghemi na hu nango weya Loi kaiwangu na i vugha kamwathi gida i vanjungohango e ghemi.

Kighikighi ghanango

²⁰ Ghanda Giya Jisas madibae i voru na i vae-munjoruna dagerawe togha memeghabananiye. Loi va i vakatha na tembe i thuweiruva mare e tine na i vanjurawe iye Sip gha Ranjimbukiki laghiye. Iya kaiwae ya nango weya Loi, iye gharemalili gha Loi,

²¹ i vairinjiya thanavu thovuthovuyeke wolaghiye e ghemi na hu vakavakatha le renuwana. Ya nangowe ne i kaiwo weinda na weya Jisas Kraisi thanavuko iya amalaghiniye i wararinako thi yomara weinda. Ra wovavwenyevwenye amalaghiniye mbanake wolaghiye ma ele ghambako. Mbwana. Ngoreiye.

²² Lo bodaboda, ya nango e ghemi na wo hu vandene wagi yawe lo utu vavurighegheke iyake

e ghemi. Letake ghautuutu iyake mbe ubotu enge iya ya rorike wennga.

²³ Nuwanguiya wo ya giya yanawami na hu ghareghare, ghaghanda Timoti kaero mendava thi rakayathu na i rangi e thiyo tine. Thongo i vamanya na i vutha e ghino, tene mbanarava weinggu wo ghaona wo thuwennga.

²⁴ Hu giya lama dagemwaewoke wenngiya lemi randevivana wolaghiye na wenngiya Loi le gharigharina wolaghiye. Ralonwelonweghathi thi rakamena Itali ele valivanga thi mwaewo e ghemi.

²⁵ Loi ghare wennga taulaghina ghemi.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 18 Apr 2025 from source files dated 31 Aug 2023

7a63d67b-b890-5db0-8880-b6fd64f3b62f